

Fiteny hebreo

Ny **fiteny hebreo** na **fiteny hebrio** dia fiteny semitika. Tenin'ny Jiosy io fiteny io. Teny fampiasan'ny Israelita nandritra ny fotoana nitrangan'ny tantara tao amin'ny Baiboly ny teny hebreo. Rehefa resin'i Babilôna i Jodà, dia nentina hatao sesitany tany Babilôna ny Jiosy ka nanomboka niteny aramaika na arameana. Tsy nampiasaina tamin'ny fiainana andavanandro intsony ny teny hebreo fa mbola fantatry ny Jiosy mpanadihady Soratra Masina ihany.

Nanan-kevitra ny hanao ny teny hebreo ho fiteny fampiasa indray ny Jiosy maro tamin'ny taonjato faha-20. Ary lasa tenin'ny firenen'i Israely tamin'ny 1948 ilay fiteny. Avy amin'ny toerana maro ny mponin'i Israely ka nanapa-kevitra ny hianatra hebreo avokoa izy ireo mba hiteny fiteny iray ihany. Ny fikambanana mifehy ny fampiasana ny teny hebreo dia ny Akademian'ny Fiteny Hebreo.

Votoatiny

Fivoaran'ny fiteny hebreo

- Ny fiteny proto-hebreo
- Ny fiteny hebreo biblika
- Ny fiteny hebreo misnaika
- Ny fiteny hebreon'ny Andro Antenantenany

Jereo koa:

- Rohy ivelany**
- Loharano**

עִבְרִית ‘Ivrit

Isan'ny mpiteny

8,3 tapitrisa

Faritany

 Israely

Sata

Teny ofisialin'i  Israely

Fivoaran'ny fiteny hebreo

Hatramin'ny niforonany dia tsy nitsaha-nivoatra ny fiteny hebreo ka tao ny hebreo biblika, ny hebreo misnika (na misnaika), ny hebreon'ny Andro Antenantenany ary ny hebreo vaovao.

Ny fiteny proto-hebreo

Ireo *Taratasin'i Amarna* na *Taratasin'i Tel-Amarna* dia taratasim-pifandraisana diplomatika egiptiana tamin'ny taonjato faha-13 tal. J.K. Ny sasany amin'ireo taratasy ireo dia avy any Kanana. Voasoratra amin'ny fiteny akadiana izy ireo. Hita anefa fa misy fitovizana amin'ny fiteny hebreo nanoratana ny Torah ny votoatin'izy ireo ka midika izany fa nisy fitenim-paritra proto-hebreo izay notenenina tao Kanana talohan'ny niorenan'ny vahoaka

Hebreo fonenana tao. Ireo taratasy ireo anefa dia tsy miresaka momba ny Hebreo fa ny amin'ny atao hoe *Apiro* izay tsy tena fantatra mazava nefa misy mampifadray azy amin'ny Hebreo.

Ankoatr'ireo zavatra momba ny fiteny ireo dia tsy fantatra mazava tsara ny tena endrik'ilay na ireo fiteny atao hoe proto-hebreo ireo. Ny azo tenenina dia izao: ireo fitenim-paritra tranain'i Fenisia (Libàna amin'izao fotoana izao) izay fantatra dia misy itovizana amin'ny fiteny hebreo tranainy ka azo atao ny milaza fa fisehon'ny fiteny iray arakaraka ny faritra itenenana azy izy ireo, izay mety notenenina tany amin'ny morontsiraka siro-palestiniana. Ny hebreo biblika dia avy amin'ireo fitenim-paritra ireo.

Tamin'ny volana Jolay 2008 tamin'ny soso-nofon-tany mifandraika amin'ny taona 1050 - 970 tal. J.K. no nahitana ny Ostrakon an'i Khirbet Qeiyafa izay mety ho soratra hebreo tranainy indrindra tao amin'ny toeram-pangadiana arkeolojikan'i Khirbet Qeiyafa, tanàna kely tamin'ny Andron'ny Vy II A.

Ny fiteny hebreo biblika

Fiteny velona ilay atao hoe hebreo biblika teo anelanelan'ny taonjato faha-12 sy faha-2 tal. J.K. Mety nifanahaka amin'ny fiteny fenisiana izy tamin'izany satria mifanakaiky ireo fiteny roa ireo^[1]. Ny fiteny hebreo no nanoratana ny Baiboly hebreo (תנ"ך / *Tanakh*). Toraka izany koa ireo soratanana hita tao Komràno teo anelanelan'ny taona 1947 sy 1956. Ny ankamaron'ireo boky apokrifan'ny Baiboly anefa dia tamin'ny fiteny arameana.

Ao amin'ny Baiboly, indrindra ao amin'ny boky voalohany, ny Genesisy (amin'ny teny hebreo: בְּרֵאשִׁית / *Bereshit*), dia ahitana ny soratra hoe אַבְרָם הָעִבְרִי (*Abram ha-'ibri* izay midika hoe "Abrama ilay Hebreo" nefa tsy milaza io lahatsoratra io fa niteny hebreo i Abrama na ny taranany. Ny teny hoe *hebreo* na *hebrio* dia mety avy amin'ny fitenenana hoe מַעֲבָר לְנַהָר / *me-'eber la-nahar* ("avy eny am-pitan'ny ony"), izay manondro ny fiavian'i Abrahama. Nanomboka tamin'ny taonjato faha-3 tal. J.K. dia nampiasa ny fiteny arameana ny Jiosy tao Palestina tamin'ny fiainany andavanandro sy tamin'ireo literatiora ivelan'ny fivavahana^[1].

Fiteny ampiasanina amin'ny fivavahana izao ny hebreo biblika ka hafa fa tsy mitovy amin'izay tenenin'ny vahoaka. Tsy ampy voambolana ny fiteny hebreo biblika izay tsy ahitana afa-tsy voan-teny latsaky ny 8 000 ka ny 2 000 dia voan-teny tsy miseho ao amin'ny Baiboly hebreo afa-tsy indray mandeha monja, ary ireo teny ireo dia voaforona tamin'ny fototeny miisa 500. Ny voambolana grika tamin'izany fotoana izany anefa dia efa nahatratra 120 000 isa^[2]. Azo antoka fa nisy voambolana hafa maro kokoa nampiasain'ny vahoaka ho fanampin'izay hita ao amin'ny Tanakh nefa nanjavona izany.

Ny fiteny hebreo misnaika

Ity endriky ny fiteny hebreo iray ity dia mifanandrify amin'ny fotoana feran'ny taonjato volohany sy faha-5 taor. J.K. izay mifanandrify koa amin'ny fotoan'ny Talmoda (taonjato faha-2 hatramin'ny faha-5). Atao hoe "hebreo rabinika" na "fitenin'ny Olonkendry" koa ity fiteny ity.

Fiteny velona nampiasaina tamin'ny fiainana andavanandro sy tao amin'ny literatiora jiosy izy io, araka ny hita amin'ireo tahirin-tsoratra hitan'ireo arkeologa tao Israely^[3]. I Abraham Geiger no nanomboka nanao fanadihadiana ara-kaifiteny tamin'izy ireo tamin'ny taona 1845.

Ny hebreo misnika (na misnaika) dia ahitana zava-baovao raha mitaha amin'ny hebreon'ny Baiboly izay taloha lavitra noho izy. Momba ny fandrafetana fehezanteny sy ny voambolana izany ka hita ireo teny nindramina tamin'ny fiteny nanjaka ara-politika na ara-kolontsaina tamin'izany fotoana izany, dia ny fiteny arameana sy grika ary persana.

Ny fiteny hebreon'ny Andro Antenantenany

Nanomboka tamin'ny taonjato faha-10 dia tany ivelan'i Palestina any am-pielezana no nitohizan'ny fampiasana ny fiteny hebreo ka mandraka amin'ny nahaterahan'io fiteny io indray tao Israely tamin'ny taonjato faha-20.

Amin'ny fiainana andavanandro dia niteny ny fitenin'ny firenena nonenany ny Jiosy, ka tsy nampiasa ny fiteny hebreo afa-tsy tamin'ny sehatry ny fivavahana. Tamin'izany fiteny hebreo izany no nanatanterahan'ny Jiosy am-pielezana ny fivavahany sy amakiany ny Torah ary andinihany ireo hevi-teny isan-karazany amin'io boky masina io. Tamin'ny fiteny hebreo koa no nifandraisan'ireo Olonkendry jiosy tamin'ny firenena samihafa. Hita araka ireo zava-bokarina ara-pivavahana sy ara-kolontsaina ary amin'ny tontolon'ny asa ireo ny fivoaran'ny fiteny hebreo nandritra ny fotoana lava.

Ny fiteny hebreo vaovao

Ny fiteny hebreo vaovao dia karazan'ny fiteny hebreo izay ampiasaina na am-bava na an-tsoratra nanomboka tamin'ny fiaharan'ny taonjato faha-19. Miavaka izy noho izy lasa fiteny velona, notenenin'ireo Sionista aloha, avy eo nampiasain'ny ankamaroan'ny Israeliana, taorian'ny taonjato maro nahafaty ny fiteny hebreo sy naha fitenim-panompoam-pivavahana fotsiny azy. Nahazo aina toy ny nateraka indray ny fiteny hebreo tamin'ny taonjato faha-20 vokatry ny asan'i Eliezer Ben Yehudah tamin'ny andron'ny atao hoe *Haskala* (השכלה).

Jereo koa:

- Abidy hebreo
- Tetiandro hebreo
- Fiteny arameana
- Fiteny semitika
- Fiteny proto-hebreo
- Fiteny hebreon'ny Baiboly
- Fiteny hebreon'ny Misnà
- Fiteny hebreon'ny Andro Antenantenany
- Fiteny hebreo vaovao

Rohy ivelany

- Révérend Docteur Charles Rakotoson, *Gramera hebreo* (<http://biographie-charles.e-monsite.com/pages/haisoratra/gramera-hebreo/>)

Loharano

1. "Hebreu, langue", *Microsoft Encarta* 2009
2. Jean Soler, *La violence monothéiste*, De Fallois, 2009, 469 p. (ISBN 978-2-87706-675-4)
3. 1, CD-Rom an'ny *Hebrew Language Historical Dictionary Project*, Jérusalem, 1998.

Hita tao amin'ny "https://mg.wikipedia.org/w/index.php?title=Fiteny_hebreo&oldid=980931"

Voaova farany tamin'ny 21 Martsa 2020 amin'ny 17:16 ity pejy ity.

Azo ampiasaina araka ny fepetra apetraky ny lisansa Creative Commons Attribution-ShareAlike ; Mety misy ny fepetra fanampiny mihatra. Jereo fepetram-pampiasana ho an'ny antsipirihany.